



V. ERANSKINA

PROBA EBALUAGARRIAK BERRIKUSTEKO PROZESUA (IKASTURTEAREN BARRUAN ETA AMAIERAN) ETA ERREKLAMAZIO-PROZESUA (BARNEKOA ETA KANPOKOA), AZKEN KALIFIKAZIOEN AURKA ETA MAILAZ IGotzeko eta Titulazioa Lortzeko Erabakien Aurka

Aplikazio-esparrua

Jarraibide hauek aplikatuko dira Oinarrizko Hezkuntzako eta Batxilergoko irakaskuntzak ematen dituzten Euskal Autonomia Erkidegoko ikastetxeetan.

Ikasleek ebaluazio objektiborako duten eskubidea

Euskal Autonomia Erkidegoko unibertsitatez kanpoko ikastetxeetako ikasleen eskubideei eta betebeharreri buruzko Dekretuan (**201/2008 Dekretua, abenduaren 2koa**) aurreikusitakoaren arabera, ikasleek eta haien gurasoek edo legezko ordezkariak —ikaslea adingabea denean— beren seme-alabei edo tutoretzapekoei egiten zaizkien ebaluazioen inguruko ebidentzia guztiak eta ebaluazio-dokumentu ofizialak eskuratu ahal izango dituzte, betiere ikastetxeko antolamendu- eta funtzionamendu-arauek zehazten duten moduan. Era berean, irakasleei argibideak eskatu ahal izango dizkiete etengabeko ebaluazioaren emaitzei buruz, arloko ikasturte amaierako ebaluazioari buruz eta mailaz igotzeko erabakiei buruz.

Ikastetxeek jakinarazi beharko dute ikasleek eta haien gurasoek, edo legezko tutoreek, nola eska diezazkieketen irakasleei edo tutoreei ikaslearen ikasketa-prozesuaren inguruan jasotzen dituzten informazioei buruzko argibideak. Bestalde, jakinaraziko dute zein bide erabili behar duten kalifikazioei buruzko erreklamazioak egiteko, baldin eta erreklamazioa jartzea egoki baderitzote.

Irakasleek beren ikasleen ebaluazio- eta kalifikazio-prozesua zehazten duten ebidentziak erregistratu beharko dituzte.

Gurasoek, edo legezko ordezkariak, eta ikasleek beren errendimenduaren ebaluazioan eragina duten dokumentu-ebidentziak eskuratu ahal izango dituzte, eta, hala eskatzen badute, haien kopia bat lor dezakete, behin zuzendu ondoren.

Era berean, alegazioak aurkeztu ahal izango dituzte eta ebaluazioaren emaitza berrikus dadin eskatu ahal izango dute. Ikastetxeek ezarriko dute zer prozedurari jarraitu beharko zaion berrikuspenera eskatzeko, eta aditzera emango dute berrikuspen hori zer epetan eta



baldintzatan egingo den. Berrikuspen hori egiterakoan kontuan hartuko da irakasleentzat lotesleak direla curriculum ofizialak, ikastetxeko curriculum proiektuak, gelako programazioak eta ikasturtearen hasieran argitaratu ziren ebaluatzeko, kalifikatzeko eta mailaz igotzeko irizpideak.

Ebaluazio-probak zaintzea eta eskuratzea

1. Ikasleek eta, ikasle adingabeen kasuan, haien gurasoek, edo legezko ordezkariak, azken ebaluazioan eragina izango duten probak eta ariketak eskuratu ahal izango dituzte, behin zuzendu ondoren.
2. Ebaluazio-prozesuaren ebidentzia dokumentalak ikasturteko edozein unetan eskuratu ahal izango dira. Antolamendu eta Funtzionamendu Erregelamenduan edo Barne Araubideko Erregelamenduan jasoko da sarbide hori erraztuko duen prozedura.
3. Ebaluazio-prozesuaren ebidentzia dokumentalak ikastetxean gordeko dira ikasturtearen amaierara arte. Epe hori amaitu denean, suntsitu ahal izango dira edo ikasleei eman ahal izango zaizkie, baldin eta erreklamazio bat egin ez bada eta erreklamazio hori ebazteko ebidentzia horiek kontuan hartu behar ez badira.
4. Erreklamazio bat ebazteko kontuan hartu behar diren ebidentzia dokumentalak gorde egin beharko dira haien gaineko administrazio-ebazpena edo ekintza judiziala posible den bitartean. Kasu horretan, ebazpena irmo izan arte mantenduko dira.

Berrikusteko eta erreklamatzeko prozedura.

1.- Proba ebaluagarriak BERRIKUSTEKO prozedura

1.A.- Ikasturtean zehar (ebaluazio ez ofizialak, kalifikazio partzialak)

Euskal Autonomia Erkidegoko unibertsitatez kanpoko ikastetxeetako ikasleen eskubideei eta betebeharrei buruzko Dekretuaren (201/2008 Dekretua, abenduaren 2koa) 9.2 artikulua hau dio ikastetxeei buruz: ***“azken kalifikazioaren gain eragina izango duten lanak, ariketak eta probak zuzendu ondotik ikusteko aukera bermatuko zaie”***.



Hori dela eta, ikastetxeek beren **Antolamendu eta Funtzionamendu Erregelamenduan edo Barne Araubideko Erregelamenduan** prozedura bat izan beharko dute arautzeko ikastetxearen barruan zer prozedura jarraituko den ikasturte osoan ikasleen ikaskuntza-prozesuari buruz egiten diren lan, ariketa eta proba ebaluagarrien berrikuspena errazteko. Ikastetxeek berrikuspen hori egiteko prozedurari buruzko beharrezko informazioa eman eta hedatuko dute.

Ebaluazioa eta kalifikazioa egin duen pertsonak, edo hura legez ordezkatzeko duenak, egingo du ebaluatu beharreko lanen, ariketen eta proben berrikuspena. Ebalua daitezkeen lanak, ariketak eta probak berrikus daitezke, baita kalifikazio partzialak (ebaluazio ez ofizialak) ere; alabaina, **ezin da horien aurkako erreklamaziorik jarri**. Akta ofizialetan agertzen diren azken kalifikazioei eta mailaz igotzeko eta/edo titulazioa lortzeko erabakiei soilik jarri ahal izango zaizkie erreklamazioak.

1.B.- Ikasturtearen amaieran (ebaluazio ofizialak, azken kalifikazioak)

Ikastetxeek bermatuko dute azken kalifikazioen aurkako **barne-berrikuspenerako eta -erreklamaziorako eskubidea** (irakaslearen aurrean eta ikastetxeko zuzendariaren aurrean, hurrenez hurren). Erreklamazio hori egin beharko da, bidezkoa bada, **kanpo-erreklamaziora** jo baino lehen (dagokion Hezkuntzako Lurralde Ordezkaritzan).

Ikasleek edo haien legezko ordezkariak bi lanegun izango dituzte azken kalifikazioen aurkako barne-berrikuspenerako eta -erreklamaziorako.

Berrikuspena errazte aldera, ikastetxeek azken kalifikazioak (ohikoak eta, hala badagokio, ezohikoak) jakinaraztearekin batera, irakasleak non eta zein ordutan egongo diren ikasleen eskura ere jakinaraziko dute. Ordutegiak bat etorri beharko du, gutxienez, azken kalifikazioak eman eta/edo jakinarazi ondoko bi egunetan irakasleak ikastetxean egon ohi diren ordutegiarekin.

Berrikuspena egingo da ebaluazioa eta kalifikazioa egin duen pertsonaren edo pertsonen aurrean, edo legez ordezkatzeko dituenaren aurrean. Berrikuspena ezin izango da mugatu kalifikazio kuantitatiboa edo kualitatiboa adieraztera; egindako hutsegiteak edo akatsak adierazi beharko dira edo kalifikazioaren azalpen arrazoitua jaso beharko da, eta, amaitzeko, **kalifikazioari eusteko edo aldatzeko** erabaki arrazoitua emango da.

Berrikusteko eskaera lotuta badago **arloan edo irakasgaia ez gainditzeko erabakiarekin, eta, bereziki, mailaz ez igotzeko edo titulazioa ez lortzeko**



erabakiarekin, zehatz-mehatz adierazi beharko da zein diren mailaren edo etaparen helburuak edo zein den **lortu gabeko** kompetentzien gutxieneko garapen-maila, baita, hala badagokio, ikasleak zer zailtasun dituen aurrerapen egokia izateko, bereziki zailtasun horiekin mailaz igoz gero.

OHARRA:

PROBA IDATZIEZ BESTELAKO TRESNEN BIDEZ EBALUATZEA

Ebaluazio-prozesua proba idatziez (azterketak, ariketak) bestelako tresnen bidez egin bada, idatziz eta zehatz-mehatz azaldu beharko dira arlo edo irakasgaia gainditzea, mailaz igotzea eta/edo titulazioa lortzea eragozten duten eskuratu gabeko gutxieneko ikaskuntzen inguruko ebidentziak.

2.- ERREKLAMAZIO-prozedura azken kalifikazioen aurka (ebaluazio ofizialak)

2.A.- Barne-erreklamazioa, ikastetxeko zuzendaritzari

Azken kalifikazioko ariketak berrikusi diren ala ez alde batera utzita, ikasleek, edo haien legezko arduradunek, **bi eskola-eguneko epean** aurkeztu ahal izango dute gai baten edo batzuen azken kalifikazioaren aurkako erreklamazioa edo, hala badagokio, mailaz igotzeko edo/eta titulazioa lortzeko erabakiaren aurkako erreklamazioa; horretarako, **idazki arrazoitua bidaliko diote ikastetxeko zuzendariari**. Kalifikazioak jakinarazi, eta bi eskola-eguneko epeaz kanpo aurkezten diren erreklamazioak automatikoki baztertuko dira.

Irakasgai baten inguruko azken kalifikazioaren aurkako erreklamazioen kasuan, ikastetxeko zuzendariak erreklamazioaren eraginpeko **irakasgaiaren ardura duen saileko buruari** helaraziko dio erreklamazioa. Saileko buruak **ezohiko bilera** deituko du, eta bilera horren **akta** egingo da. Bileran horretan, saileko kideek eztabaidatuko dute ea ebaluazioa eta kalifikazioa aurreikusitakoaren arabera egin diren eta ezarritako ebaluazio-irizpideak behar bezala aplikatu diren. Saileko buruak **txosten arrazoitua eta ebazpen-proposamena** bidali beharko dio zuzendariari **erreklamazio-aldia amaitu eta 24 orduko epean**. Pertsona bakarreko sailen kasuan, irakasgaiaren irakaslea eta ikasketaburua bilduko dira bileran.

Mailaz igotzeko eta/edo titulazioa lortzeko erabakiaren aurkako erreklamazioen kasuan, ikastetxeko zuzendariak **ikaslearen talde ofizialeko tutoreari** helaraziko dio erreklamazioa. Tutoreak irakasle taldearen **ezohiko bilera** deituko du, eta bileraren **akta** egingo da. Tutoreak **txosten arrazoitua eta ebazpen-proposamena bidali**



beharko dio ikastetxeko zuzendaritzari **erreklamazio-aldia amaitu eta 24 orduko epean**.

Irakasgai baten azken kalifikazioaren aurkako erreklamazioa onartzen bada, eta, ondorioz, **mailaz igotzeko eta/edo titulazioa lortzeko erabakia alda** badaiteke edo aldatu behar bada, ikastetxeko zuzendariak **ikaslearen talde ofizialeko tutoreari** helaraziko dio ebazpena. Tutoreak irakasle taldearen **ezohiko bilera** deituko du, eta bileraren **akta** egingo da. Tutoreak **txosten arrazoitua eta ebazpen-proposamena bidali beharko dio** ikastetxeko zuzendaritzari **erreklamazio-aldia amaitu eta 24 orduko epean**.

Zuzendariak ebatziko du barne-erreklamazioa, ebazpenaren arrazoiak emanda, eta **erreklamatzailerari jakinaraziko zaio ebazpena**, betiere Administrazio Publikoen Administrazio Prozedura Erkidearen Legean (39/2015 Legea) ezarritako moduan. Erreklamazioa onartzen bada, zuzendariak **bidezko aktak alda daitezzen** aginduko du.

Ikastetxeko zuzendaritzak egindako barne-erreklamazioaren ebazpenaren aurkako **kanpo-erreklamazioa jarri ahal izango zaio dagokion lurralde-ordezkaritzako titularrari**.

2.B.- Kanpo-erreklamazioa, Hezkuntzako lurralde-ordezkaritzari

Barne-erreklamazioaren ebazpenarekin ados ez badaude, ikasleek edo haien legezko ordezkariak erreklamazioa aurkeztu ahal izango dute ikastetxeko zuzendariaren ebazpenaren aurka, ebazpena jakinarazi eta **bi laneguneko epean**. Horretarako, ikastetxeko zuzendaritzari idazki arrazoitu bat aurkeztu beharko diote, Hezkuntzako Lurralde Ordezkaritzara bidal dadin.

Ikastetxeko zuzendariak gehienez **hiru eguneko epean** bidaliko dio erreklamazio-idazkia Hezkuntzako Lurralde Ordezkaritzako titularrari, erreklamatzailerak aurkeztutako dokumentazioarekin batera eta erreklamazioa eragin duen kalifikazioaren ebidentzia guztiekin batera.

Ebidentzia horien artean egongo dira ikastetxean egindako barne-erreklamazioan sortutako dokumentazioa, erreklamazioan sortutako beste edozein gorabehera, erreklamazioa eragin duten jatorrizko ariketak, programazioa jasotzen duen sailaren dokumentazioa, eskatutako gutxieneko konpetentzia-maila, ebaluazio-irizpideak, eta abar.



Lurralde Ordezkaritzako titularrak erreklamazioa ebatziko du, **Hezkuntzako Ikuskaritzak txosten arrazoitua** eman ondoren. Txosten hori gehienez ere **hamar egun naturaleko** epean egin beharko da.

Txosten hau egiteko garaian, Hezkuntzako Ikuskaritzak alderdi hauek hartuko ditu kontuan: honako jarraibide hauek; ikastetxearen curriculum-proiektua; kasuan kasuko arloaren edo irakasgaiaren programazio didaktikoa; ebaluazio-irizpideak; eska daitezkeen gutxieneko konpetentzia-mailak; gertaera publikoak kalifikatzeko irizpideak; kalifikazioa eusten duten ebidentziak; ebaluazio-prozesuan erabilitako tresnak eta prozedurak; ikaslearen ariketak, lanak, probak eta azterketak; eta, hala badagokio, beste ikasle batzuen ariketak, lanak eta azterketak, konparazioak egin ahal izan daitezen eta ikasle erreklamatzailerak lortutako kalifikazioak modu objektiboan baloratu ahal izan daitezen.

Txosten horretan, Hezkuntzako Ikuskaritzak proposamen arrazoitua egingo du erreklamazioaren onarpen osoari edo partzialari buruz, erreklamazioa ezesteari buruz, prozeduraren atzeraeraginari buruz —ebaluaziorako beste proba eta/edo ariketa batzuk egiteko—, edo ikastetxeak argitaratutako kalifikazio-irizpideetan aurreikusitakoarekin bat ez datozen kalifikazioak aldatzeari buruz.

Lurralde-ordezkaritzaren titularrak modu arrazoituan ebatziko du erreklamazioa, eta gehienez ere hiru eguneko epean egingo du, ikuskapen-txostena jasotzen duenetik hasita. Ikastetxeko zuzendaritzaren bidez jakinaraziko die bere ebazpena **ikasleari**, kalifikazioa erreklamatzaren zaion arloko **irakasleari** eta **irakasle taldeari**.

OHARRA:

EBALUAZIOA PROBA IDATZIEZ BESTELAKO TRESNEN BIDEZ

Ebaluazio-prozesua proba idatziez (azterketak, ariketak) bestelako tresnen bidez egin bada, idatziz eta zehatz-mehatz azaldu beharko dira arlo edo irakasgaia gainditzea, mailaz igotzea eta/edo titulazioa lortzea eragozten duten eskuratu gabeko gutxieneko ikaskuntzen inguruko ebidentziak.



HEZKUNTZA SAILA
Hezkuntza Sailburuordetza

DEPARTAMENTO DE EDUCACIÓN
Viceconsejería de Educación

2.C.- Gora jotzeko errekurtoa, Hezkuntza Sailburuordetzari

Hezkuntzako Lurralde Ordezkaritzaren titularraren ebazpenaren aurka **gora jotzeko errekurtoa** jarri ahal izango zaio **Hezkuntzako sailburuordeari** hilabeteko epean.